



農丈人文集卷之十四目錄

墓誌銘一十一首

明故中順大夫贛州府知府顧公墓誌銘

少保沈公元配贈一品夫人張氏墓誌銘

封大理寺左評事鍾公暨配封孺人顏氏

合葬墓誌銘代作

明故勅封文林郎寧波府推官張君墓誌

銘

明故勅封孺人張母沈氏墓誌銘

勅封孺人華母張氏墓誌銘

明登仕郎工部司務馮公墓誌銘

方伯鄒公元配封宜人陳氏墓誌銘

門人郝京兆母贈孺人張氏墓誌銘

門人郝京兆配贈孺人高氏墓誌銘

翁秦媪薛氏墓誌銘

墓碣一首

鄞邑庠訓導吳君墓碣

農丈人文集目錄卷之十四

農丈人文集卷之十四

古鄞余寅僧杲著

墓誌銘一十一首

明故中順大夫贛州府知府顧公墓誌銘

余獲交武林顧青嶼先生蓋得之姜隱君貞云
隱君貞者伉爽操其孤特以衡一世絕不輕許
可顧獨許顧先生時時道其行事揚相至不容
口已或怒張隨之猝烏嗟駭至欲泣下余每聽
之未嘗不搥擊相與怪歎也昨年報我曰顧先

生不幸溘焉逝矣天生顧先生有盛德而不竟
施卒令阨塞以死貞獨身無能贖顧先生者獨
念墓石追寫平生雄烈垂之百代不朽其孤必
且旦暮匍匐門下若貞者顧先生之死友也敢
私布之已孤自漬苴斬伏地持其所為狀以請
余哀而許之顧先生名鈴字朝肅其先嘉禾人
曾大父越徙仁和今為仁和人父邨清流縣主
簿以先生考績封文林郎覃恩改監察御史母
周氏封孺人耦德並邁具余所為墓碑中先生

有大志性高朗持己嚴重遇事篤誠而行之無
漫語無詭貌為博士弟子辛酉餼遂舉於鄉辛
未署學正通州日唯躬課率諸生恣恣無敢偷
越繩約更作不軌者壬申改贛榆令贛榆瀕海
地确澗其民皆窳歲洊蓄先生太息曰疋甚矣
抑何劑起之乃悉意撫摩為斥滯膚呼之集給
之牛種為辨杭稷所以異募南人之良於耕者
道寸之力穡旦晚巡行龍畝間隨而聽斷焉如是
五年元氣復還百姓嘻嘻以為樂土凡男婦來

歸者三千六百餘戶墾田九百餘頃是時淮海
備兵使者桂林舒公號知人遂深心委信列其
狀天曹政府取閱之大詫兵使者乃能知賢令
使諸監司甄別下屬每若此何憂海內不治哉
乃特授福建道監察御史蓋是歲丁丑又明年
出按粵西粵西八寨故挾六十三山為梗率三
歲一勦十年則粵東西合勦謂之大征御史謂
其開府公八寨固禍首八寨靖諸魑胡敢索死
草間且無弗畏死者既寘矣乃虔劉吾赤子以

充俘馘若而臣固漏誅人耳吾何忍為於是披
腹示土司無不向我願為我奔奏者已而八寨
果肆螫因命為鄉導我兵隨而殲之不兩月八
寨平卒罷大征凡省軍興萬計活民命亦萬計
顧無柰諸漏誅者恚何也是歲大比士畢忽以
憂行已又罹內艱甲申服闋補江西道臺長姚
江趙公采望實遂用按三楚甫出都門銓曹中
讒者言移贛州守贛固多谿洞竊出殺掠人屬
岑岡諸巢叛敗南雄兵劫龍南定南二縣郡中

震恐是時中丞某者選悞不入境守巡俱闕太守毅然決計禽獮乃大發官兵當賊衝而陰用土兵擣其虛遂擒渠盜王清筭李沛迫乃降中丞某聞已得賊乃前先帥官兵者欲張其功又係羈老弱及近境居民五百人以啗中丞某太守曰是何辜盡釋遣之止錄前所獲三十幾人以正法中丞某忿甚而部使者又欲縱李沛太守謂沛降在敗後安可縱竟梟沛首於市中丞某積不能平遂肆其妬媚妄作飛語而太守無

堪齟齬至此遂棄官歸先生在公不計私在事不顧前或掣我後者掎我唯知如是為悉迺裏慙迺職即奉以周旋已爾惶恤其他何論彼人斯乃天家竟亦置之不再敘何邪先生事親孝嘗用迎春為愉適事兄貢士銘迨弟公安丞鐔姊若妹嫠者兩大功兄乳者老彌篤平生急義若渴其應人若響無問戚屬及所嘗知識罄橐周之不以貧為解不絕俗亦不緇俗稚孺滿其膝前婚嫁未畢徒用清白遺之死無他恨蓋古

人賢腸宛然先正儀矩殆山川間氣鍾而有斯
人邪辛丑三月二十三日以痰疾不揀距生嘉
靖庚寅六月十六日享年七十有二配陳氏贈
孺人武林萬戶鼎孫女繼俞氏大司空琳孫女
載繼鄭氏封孺人孝廉怡女子男六自汀陳出
娶鄒郡諸生國禎女自瀆邑庠生娶凌給事中
登瀛女自冲娶鄒貴州憲長孝女自淇娶鄒太
學生鼎元女自潢聘盤石叅戎吳允中女自津
未聘俱鄭出女四長適余同年餘杭徐別駕桐

次適孝豐吳應時俱陳出次適海寧唐括俞出
次許字錢兆行鄭出孫男六有楠娶張中丞濂
孫女有梅娶吳時女桂彬柯斐俱未聘女三長
適沈徽州知府文長孫郡庠生士份餘未字先
生歿三月而杭父老子弟走籲所司願躋之賢
祠光我俎豆允行焉諸孤卜以今年十二月某
日奉遷某山遂系之銘銘曰

緊古德與帝對布明愷敦以至黔首逋舖用饒
不戢火將焉暨利執言以狂獬匪其朋忍獵恣

嗟頂趾伊汝賜福曼羨仁哉沛歌而舞誰懼伎
綠盤綬白無賴臣不佞敢自快生莫徒義為類
天乳長海來會括人歸永不媿

少保沈公元配贈一品夫人張氏墓誌銘

自昔上公躬山玄之秉朝夕薦所馨香於斧扆
若夏靡殷甘傳周閔頤諸先正勲名耀天壤而
慶祚流胤裔豈偶然值之蓋必有佐其以一德
興者夫閭則大矣用能端宅繩準以大埤於有
政所其君子優游委珮而不以家私損其奏畫

之忱若今張夫人之事少保公則真良內贊乎
萬曆甲午少保公趨東閣之命其時夫人病未
從明年乃北又二年丁亥正月三日竟歿於京
邸公於夫人豈直靡靡于處嬉而即都云哉乍
遭之大不勝楚於是為狀走使者謂余吾內子
真三益之友君所悉也平日以伯兄事君今其
一旦無憐諸其為我銘其墓余於少保公誼若
昆季宜有均悼遂摠所悽惻勉為銘按狀夫人
姓張氏遠系唐刺史張次宗有孫曰仁皓兵馬

鈴轄當黃巢亂後撫集流移士人德之為廟祀
今茅山蓋有冢云至於夫人之父雲而式微母
柯舉夫人於鄆之採蓮里夫人懿淋自其性紅
巧目眇而就恬於靖穆言笑不苟父母絕愛之
不輕字已大母夢龍夭矯爛然金光麗於楣語
張公此何祥也語未畢而媒者以沈郎入告公
慨然俞之吾茲召華上珍謹付沈氏倩矣歲已
未乃婚婚七日而少保遽之學舍夫人安焉且
勸之卒業也少保大賢之當是時少保貧自尊

嫜暨於伯叔氏罔不圖所以日夫人以釋齒操
作常不後於二妣以是大得太夫人歡謂張新
婦宜我既少保領鄉薦氣稍蘇猶不憚作苦二
女皆自乳暨登第以往祿入漸充終守儉勤不
少侈放居嘗念太夫人蚤逝不共享大官法饌
即從少保而夙夜於贈少保無闕雖在遠意尤
蒸蒸殷至待諸姑伯叔有禮事少保終老無褻
貌無矯意無匿有語必確有謀必折其衷以聽
少保蓋以身儀者夫人以誠輸恢恢匡郭導迎

不為阿審諦不為迂浸假歲月而愷厚之象盎
溢庭幃間所尤特拔者年未四十輒謀置其貳
同邑王已復進兩張氏皆濁世皎皎獨行足為
內者表是時夫人止一子秦鴻秦鴻未及鬢青即
瞽之巖傍睨者亦以為不堪也乃卒成溫文雅
器已少保應 內命則又謂秦鴻兒信才他日
誰明其不然者近事殊駭人其無赴省試為汝
父累秦鴻敬諾遂不赴省試丈夫哉灑然高世
俗之見邪嘗悵然念其父家衰門也而鍾我有

如我也而終鮮聰強兄弟然迄無私庇田廬半
子多少保公為之經紀夫人豈知天道哉不強
為憊者圖盈也乃夫攝束下人截以齊恩威錯
出惟所宜覆我不幸空悲思允哉房中之哀此
已至其不惑於福田之說輒有妄施卒令魅者
不敢瞞其室此又內者之極操也少保凡十男
六女夫人生長男即秦鴻廩郡庠茲以 東宮
恩授尚寶司司丞娶范氏少司馬欽之子光祿
署丞大冲女秦泳秦藩則再次側室張出俱未

聘餘俱殤夫人生璆英配柴方伯涑之子以觀
再次側室張生某英許字恩生周元起宮詹應
賓之子餘俱殤孫男女各二延賞聘太保余文
敏公仲子都事廷椿女延禧聘陳舉人憲學女
延璋許字王道貞江西叅政佐子延復許字陳
久盛翰林編脩之龍子俱泰鴻出嗟夫夫人有
陰騭於沈遂令沈宗廓弘蕃懽天之顯鑒若是
乃竟阮其壽云何者距其生嘉靖壬寅三月十
七日享年僅五十六歲傷哉夫人累封至夫人

贈一品夫人訃聞

上閔之遣中使盧受致賻精鏤寶鈔皓紵白
䟽麻各如干賜祭加一壇宗伯移浙江叅政吳
公鴻洙行禮命有司營葬域於某山之陽司空
奏遣行人姚君孟煜董厥事恩禮備至馬卜以
某年月日終寤事銘曰

泰階肇指運曆朗起篤良軌兮靈源迪晷鄂不
端委抱重珥兮有紛芳芷滿其絢履衣玉榮兮
小星在渚納彼裨海德彌美兮無巨不阜無細

不守式禮園兮閭闔惟耳從君子揆勤天璽
兮云何靜顛不共禊祉忽摧圯兮帝聞若咫
頻繁自陞載命簪兮詔作丘峙其築如時歸爾
寶兮巖岬環負以昌萬似白若砥兮

封大理寺左評事鍾公暨配封孺人顏氏

合葬墓誌銘 代作

歲壬午封大理寺左評事鍾公卒前是戊午公
配封孺人顏氏卒蓋先公二十年逝已余故與
公之子潤州太守庾陽同年又俱出某公門下

誼家密於是其明年余應召北上道秀水吊公
是時太守纍然苦塊中輒以墓石見命曰所不
恨吾兩尊人厚窆者惟太史矣今年乙酉某月
某日將合窆於某圩之阡遂以行略至余讀之
怛然恫於余衷即不文烏能不為太守一識其
私臆垂之永永按略鍾世為禦兒人自公曾大
父濟贅秀水之永樂鄉因家於秀水濟生完無
子以其兄之季子驛後之璧娶於趙生公公諱
某字士英幼穎敏端重儼焉有巨人之志年十

八以尚書通補邑弟子負未幾用高等餼于庠
公雖名經生然丰度恢達用經略自廣甲寅乙
卯間島夷毒痛內地東南為震嘉禾守劉公圖
所為防禦者大抵多公計畫郡迄以有預戒公
忼慨喜談事至邑里隱痛尤無顧諱諸當路信
重公無不采行其議者往寧庶人稱亂諸部刺
編氓為勤王兵公諸父匿不肯行公父奮曰譬
在也而使賤隸追呼我老親譬安用生為遂荷
戈往是時公父尚未冠里人莫不誦其義高公

居常冲退漠無勝心至其觸事翔發思一申其
計說以使斯人或有瘳輒毅不可奪大槩類其
父云公初受業於顏學博學博竒之遂以其季
女配公則封孺人也孺人執勤有禮公嘗游行
授徒兩尊人以無兒乎其側也頗不樂孺人曲
意承之未嘗失歡叔氏無子所子弗能子公奉
而衣食之幾四十年歿又於公殯也族有窶昆
弟既時調之又酌而逞公勿為怒絕調如初率
皆孺人慇懃成之凡孺人先公能為代後公能

為贊蓋與更三年喪者二孺人故病腕歲或再
作楚卒以是不栉而公凡十試十不售氣猶猛
顛哭泣之餘雙瞳稍枯會督學且齟齬老生遂
投牒謝去此何謂憐才矣公卒是年之九月八
日距生正德丁丑四月十三日年六十有六孺
人卒是年之八月十二日距生正德癸酉四月
五日年四十有六孺人舉一男即康陽太守娶
工部郎孫詔仲女二女長室陝州判屠鉞之子
汝河次室刑部郎王愛之子汝聽俱庠生孺人

歿再娶徐舉一女室太學生屠仲行之子臨祉
太學生孫男一殤女一許字太學生項元汴之
子德達太守自勝冠以往輒有孺人悲既通籍
愈益悲通籍以往數迎養公不時至至或不踰
時則又悲時所湏正如公乃竟坎壈終晚僅拜
一封勅酬公何等也詩亦太息昊天罔極宜
太守之不能為日也銘曰

豈不誠諤空雄里閭豈不誠勅不登皇除胡耦
而耕不耦而償生不並償歿乃偕藏中有銘石

玄光黜質庶幾昌藉以永無泐

明故勅封文林郎寧波府推官張君墓誌

銘

寧郡理張公在事六年伉爽有執為東南諸法
曹冠行且內陟矣遽以母艱去則走余山齋空
首請曰渠不孝摧慘極痛靡所逃貫敢藉手儀
部屠君狀賜之銘庶光我兩大人於幽余與郡
理公寔習不能辭贈君諱廷言字國聽六世祖
賢二者從楚之麻城徙蜀籍於巴為初祖曾大

父本厭世置濁挈其室潛入山作苦行頭陀大
父伯紀甫髫年行求積歲獲之瓦屋間奉以歸
築禪舍廟堙谷中供事不忍離本夫婦俱九十
歲伯紀夫婦俱八十三乃終豈其始得之戒攝
繼得之婉順邪此可以觀胡考之道也父鵬母
郭氏生贈君為諸生能文至秋卷輒黜弗錄娶
沈氏初舉三女子俱適衣冠士族後舉五男子
俱夭父母及其內子欲為置副室贈君毅然謝
不可明年得司理公及黻課督過苦不以難子

稍寬之嘗舉鄉先達若蹇忠定公勉使勦焉以
故公少成若風植然者贈君故病胃既良已已
卯忽復作司理公捷書至則既瞑矣已丑公成
進士官吾寧三年考取 詔贈如公官沈封孺
人君生某年月日卒某年月日得年某十某歲
葬某鄉某原一子即司理公名似渠娶余貢生
寵之長女再娶劉贈封如例孫男二賡南夢南
女一姻族具狀中贈君亢直能斷無已於阿無
人於貴勢鄉隣宗重之視其齒頰為三尺枉不

平則以質之多解去遺業故薄至贈君益落不
以其故替孝敬父母喜曰爾善事我他日必有
顯子孫今果然銘曰

大道多蹇視其所踐其峙若巘而胡報之不闡
上帝有錫醫閭玕邪發揚清明照江隅邪維石
之永曜黃壚邪

明故勅封孺人張母沈氏墓誌銘

余既為寧郡理張公銘其尊人贈君先生墓石
又為其妣封孺人沈氏墓銘封孺人父泚鄉貢

士署慈利縣教諭卒官偕其母羅扶觀歸年十
九償贈君敦素無靡曼劬不辭瘁喜迎承舅姑
無迕產三女俱笄五男俱短折太息曰憊矣我
請休願以嗣事委進少姬贈君辭不可明年果
得司理公已卯司理公登鄉書已不逮贈君封
孺人慟曰嗟乎吾耦耕者忍獨視穫入邪及公
成進士理吾郡課家奉 貽典以進封孺人又
慟曰嗟乎等庶身令未亡人獨噤香餽者吾即
噴庸得甘乎前是封孺人不欲東強乃東既三

年文無害並聲振作調輯塵戶如更甦惠流於
枯駭封孺人喜曰兒不負先子之志矣我其西
留之強不可則命其內子及子奉之西誰謂茲
西也雖戈揮之不返乎封孺人生某年月日卒
萬曆乙未十二月十七日享年七十有九子一
即司理公名似渠婦余繼劉孫男二賡南夢南
女一其詳在屠儀部狀中今年某月某日寔某
鄉某原銘曰

太君來翩從何旆鳳文瑤華界靈瑞洞光電采

姦其粹載厥必參鵠嘉妃五宗百陌俱歎貴薄
蝕且爾鬼難媚女何盡劫男盡瘞此時束身甘
自避願進妹麗延氣類良人執義威感喟有如
此言天不祐帝聰果然端不殺執法星精爾作
嗣外勅科條內規誨家篤盎溫伊之賜 詔遡
其勤龍駢賁大歸有期不得諱儼懿在躬鐫在
石上者守之歲莫既

勅封孺人華母張氏墓誌銘

封孺人張氏者毓於江陰之疏黃村而歸無錫

今贈文林郎鄞縣知縣華處士坊為元室張江
陰著姓其居與錫之九里橋址相錯而封孺人
之父太學生某又與贈君之大王父叅政蹇齋
先生厚善因以其女配贈君封孺人端慧父口
授孝經小學能誦而惟之精於女紅間試以家
政又便便若素習父及母王氏絕憐愛之曰惜
乎不男也男胡不亢吾宗年十八來歸是時姑
鄒逝事舅與繼姑楊及送之往成秩有禮贈君
以封孺人能其家得安肆儒業而贈君之伯兄

孝廉某歿家日多故歲游侵同產乘其落陵侮之贈君無如何棄其業以從於農而內事不勝迫外事不勝闕封孺人與相楮柱日夜從史贈君引義自裁無終怨於脩自是盡用起德厚聞宗黨間無不誦封孺人賢者贈君又納側室曰李媪懌懌晏溫善下封孺人肺親之以達於贈君於是封孺人年三十六矣連舉五女李媪先五月而舉一男士標即吾鄞令君後而封孺人舉一男士禎封孺人鞠之無彼我觀封孺人務

行約獨豐餼其塾師與贈君嚴借之以督二子於學也萬曆癸酉二子俱籍諸生丙子令君登賢書其年冬贈君卒己丑令君成進士釋褐來令吾鄞癸巳三年考官例得恩封爾書在途而封孺人以七月廿四日疾終距生正德丁丑後十二月初二日享年七十有七子二長即令君娶倪氏某女次即士禎國子生娶張氏某女卒繼尤氏邑庠生某女女六長適馮埴次適安希顥次適鄒游之次適浦志學次適黃建任李媪

出者遼蔡四陽孫男八象觀象謙象升俱士標
出象晉象鼎象震象蒙象恒士楨出孫女六士
標出者二其出土楨四曾孫女一象觀出令君
英特斤斤奉職思一榮其親乃俱不獲身拜勅
去之日銜哀稽首請墓銘已馳狀來告今年癸
巳十二月十二日奉權與贈君合塋唐阡願終
惠前諾余惟封孺人德美略具矣至其距一切
懺唄不妄隨俗希艷福田尤閨閣所難固宜銘
銘曰

詎鮮當戶孰殿爾廡詎鮮當席孰光爾祔祁祁
郁芬莫不孔並迺迺明閨錫茲天壘懿其閨
宗作配永尊山冢峯隆以我銘存

明登仕郎工部司務馮公墓誌銘

歲丁亥四月二十八日余友僚馮公墓諸孤諸
孤業營葬事顧幽石未備於是冢嗣比部君蒲
服頓顙問石言於余余以萬曆庚辰授水部郎
其時公已綜將作廳事兩年矣頃之以憂南服
闕再補冬官又獲與公從事玄雲署中僚誼頗

不薄而比部君又以其婦翁顧君狀來按狀公
名季兆字汝行邑博上弟子甲子登賢書四上
春官不第遂署鎮平縣儒學教諭擢國子學錄
改工部司務馮之先系唐開元中諱叔和者為
禮部尚書遷江左逮南唐名延已者昆弟俱登
八座始遷明州之慈谿世宦族曾祖昕祖禾父
燮封中順大夫池州府知府母錢贈太恭人俱
以公之伯兄方伯公叔吉貴公之為鎮平嚴有
體銅陵令者嘗齟齬方伯公時議以為不直調

之鎮平公以禮自將卒不能有加於公論者賢
之丙子同江西秋試拔士十三人稱得雋冬曹
溷藪進與其中貴人睨退則比大賈其不為所
溼墮溝壑中或百之一二乎公從部尚書綱紀
諸胥無敢橫大抵謗從諸營建起即無身茲役
者何從污鱗我公竟以得全公生平質恪無矯
炫不妄言笑而和氣盡於其顏挹之其恬默足
師也性孝友往島夷殘燬邑社公跋涉幾千里
得侍兩大人無恙歡為甚太恭人疾以身禱奔

封大夫喪幾覆舟寶應湖中皆可紀公生嘉靖
丁酉九月十六日得年僅五十一配錢氏子男
二長若愚即比部君乙未進士娶顧君琨女次
若蒙庠生娶餘妣都御史孫公應奎孫女女一
適漳州貳守姚君應龍子庠生宗禹孫男二女
四以某年月日葬於某山之麓銘曰
豈不亦錄邪胡然歟輻也豈不亦祿邪胡然
搯厥服也注之以若谷乎而償之以若稯乎而
帝寔不智庶其爰篤乎而

方伯鄒公元配封宜人陳氏墓誌銘

萬曆丁酉方伯鄒公元配陳宜人病歿方伯公
餘姚人山東左布政使則走吾鄞謂余往丁卯
徵幸與余先生同舉是時先生齒家長固應弟
我弟我即弟婦吾婦矣茲不幸吾婦歿敢以墓
銘辱余敬諾則取御史大夫孫公所為狀讀之
其佐冢婦供羊飴瀟滑上以衎大人而退以燕
夫子若尋常事然者至其視側室白姬煦然溫
澤務覆匿其纖芥無厲聲色遽加之已病瘵猶

抱哺其子濱於殆不捨匪特姚之人難之狀媿
媿頌不休若甚忻慕焉者宜人姓陳氏古虞著
姓父某母黃氏以嘉靖丙午生宜人年二十始
嬪方伯公又明年方伯公舉於鄉明年成進士
授溧陽令入為儀曹郎再覃恩初封安人已封
宜人鄒固貧世治博士家言不效而驟發於方
伯公是時方伯公父母大父母俱無恙方伯公
十一遷而至今官宜人從入燕三入汴入楚已
入粵入齊是日也萬里于邁豈嘗照耀金紫弛

然饗君夫人之樂也彌昏與曉所為勉効舅姑
前者三十年如一日蓋與方伯公更期年喪者
再更三年喪者又再乃至以髮終也宜人生二
子長光緒次光緯三女白姬一女姻屬俱列狀
中宜人歿而宜人所抱哺白姬子亦殤世之聰
強婦人豈少哉乃者苛不百不止極而反禍不
百不止白乎無輕蔑衾裯太息不猶也抑吾有
嘒焉始乎姣卒乎專宵始乎媿卒乎極席寔自
蹈焉使人悅瘁倘非方伯公有以斯之疑不至

此宜人年僅五十二歲某年月日葬某山銘曰
體自然者泚邪與性諧與土風乖者歎邪克篤
徽音以恭乃公苟以恭公何必自躬誰題隧宮
式茲婦宗

門人郝京兆母贈孺人張氏墓志銘

余以歲乙丑館於江都封比部郝翁之塾翁之
家孫今京兆李官曰道行者定稟業焉其時京
兆尊人宜齋君母張氏俱蚤謝京兆孤有遐表
日兢兢帥余所課肄退而循習封比部及王母

封安人訓言為淬砥於時鋒穎峻發諸姻黨莫
不嘖嘖稱京兆為偉器焉萬曆壬午京兆由辟
雍稱選士丙申拜單父令三年政聲起海岱間
奏宥贈其尊君如單父母贈孺人庚子擢京兆
司李明年走書謂余惟吾師習於郝之故矣夫
郝有闕而不揚非吾師所忍先單父幽石頗具
獨無辭以華母氏之隧不肖烏用生為者惟吾
師幸許余遽諾張之先臨汾社東里人也世用
塩筴起弘治中由河東占籍維揚父鳳母鄭氏

舉贈孺人蓋季女而是時封比部從燕都卜居
維揚有子仲未耦聞贈孺人慧遂請婚焉既歸
則襄贈單父誦而身力紅是時封比部以齷豪
郡中而伯子某公者第進士歷官少叅郝於淮
海間號為畏壘是時內外指無慮數千諸姑伯
姊紛岐孔出娣姒貴倨不易得當贈孺人以柔
退後先之宗姻莫不謂宜是時贈單父抱藝有
聲屢不得志於北雍曰吾何時得誦通竊比於
吾伯兄也久之悒憤不可開贈孺人百方譬寬

之至苦身為調而還自憊於是兩人病遂卒而
贈孺人先逝僅年三十有七距四十八日贈單
父亦逝贈孺人生二子長即京兆吾徒道行娶
高氏具以單父家贈孺人次時習太學生娶某
氏無子以京兆之胤文龍為嗣諸孫男五人女
八人及諸姻屬具贈單父誌中嘉靖己未臘之
二十四日即金匱山合窆焉凡余誌及銘盡京
兆灑泣中語銘曰
揚之汭姝來下壁耦俱光未午吁披離土雙巨

天贊戶紉迺緒等琨瑜百輝起詔何其帝大俯
載嵯嶺耀厥祖福流衍永蕃聚譽安歸于石處
襲瑤琚以億壽

門人郝京兆配贈孺人高氏墓志銘

門人郝謙伯既拜單父令之明年丁酉厥配贈
孺人高氏歸歿於江都將謀窆事問銘焉余惟
古諛聞之事尚矣受者病滂施者病阿誠懼其
浮也假令彭大司空戴少府一旦慘感而請言
於張丞相不識張丞相應之否京兆白固天鍾

之烏能効拊盆而不念舞鏡者願辱吾師一言
室氏死且不朽余遂不能辭贈孺人高姓父格
光祿署丞母盛氏大父遷明州府推官余因憶
初館於江都光祿君邀我郊園其時芍藥盛開
其日大往矣其潛如新京兆泫然曰芍藥固名
將離也吾師得無傷離邪於是為之哀將離將
離將離婀娜其枝汎光晨熙歛其颺吹恍於何
施杳不知伊人之所之其時光祿君謂我吾先
府君携我入明州我於衙齋木盞滿水而弄海

錯若一沙彌頭顱者余應之曰此蘇子瞻所謂
章舉先生者也子瞻嘗作江瑤生傳指以相匹
京兆曰事舊矣願吾師稍稱誅余謂姑無庸他
日誅光祿君爾京兆固以請余乃為之誅將離
宛若都天孫徒聲提扶太息流蘇柰何乎集枯
是時京兆父及母世父少叅公及諸父俱蚤世
獨大父封比部公把握門戶四方宦轍多出其
孔途酬應一切顧已耄於時外恃一孤孫內恃
一孤孫婦而郝蓋岌岌是故贈孺人竊自傷也

不獲承顏舅姑而得嚴事大舅姑大舅姑一日
在者即郝之百年敢不虔焉相夫子課藝經術
腴鬯遂發解北平汜於今宦成名立京兆駸駸
萬里途而孺人則已矣已矣單父奏家 勅贈
孺人孺人無子止一女適邑子宗日新孺人度
寡育則進宜子者數人京兆遂多子男五人長
雲龍聘喬太學進德女次從龍聘吾同年司徒
郎閻公士選女次承龍聘中丞李公植女次文
龍出為京兆弟時習後次廷龍女自宗氏女外

又七人次適郡庠生王日章次適喬可弘次適光祿署丞王應穀次適卞元化次適喬可奇次適杜某次未字皆側室出封比部自燕來百十年矣獨遺京兆一身乃今繁衍若此非贈孺人之有容德烏以及茲余故極歎羨之焉贈孺人生嘉靖某年月日卒萬曆某年月日得年若干歲卜某年月日葬某山銘曰

安所籍夫子九芎蘼安所光夫子七紫泥安所報夫子五熊羆安所乞夫子崑崙軸帶六尺土

千齡不朽茗華辭

翁泰媪薛氏墓誌銘

翁泰媪者承重孫邑博士弟子惠祥之王母也泰媪一子名拱極贈禮科給事中先媪歿婦王封孺人五孫長即惠祥次懋祥郡弟子貞次憲祥禮科給事中次應祥舉人次愈祥會稽令往給事令吾郵適泰媪壽九旬封孺人六旬余寔為郵人士祝觴蓋曰海邦長荷我仁君者寔惟兩慈母寵靈之已給事應 召北上會稽南來

其時秦媪尚無恙居頃之遽棄諸孫逝矣諸孫
號踊無如何則為之計寔石曰鄞固有善頌者
其語也信於是給事為狀偕其昆季拜使者於
庭屬實誌其墓按狀秦媪姓薛氏父某母張氏
以正德戊辰十月十一日舉媪於海虞之前洲
里薛德門媪懿泚是鍾蚤慧知檢攝不妄言笑
七歲喪母有孝性諸儀不保姆而克閑女紅不
師而習舅氏方為介石公擇配曰宜莫如薛賢
遂嬪介石先生是時舅氏嚴周氏姑之秉家也

整然獨宜薛新婦媪温粹油油與娣姒偕絕無
嗟異而上堂祇視舅姑無關姑歿又視其繼姑
楊下堂相夫子勸之學盖躬恭夙給而感秩於
禮焉先生穎篤學成充邑庠增廣負乃竟數竒
不售又危禍意外侵之是時先生以學業傳之
贈公稱邑弟子負而封孺人來則既總襄內政
於是贈公日夜呼暴寃狀媪屏營焦顛率其婦
子拮据以亟所需誣卒白產亦不挫於是宗黨
謂媪有完戶才久之介石公歿則替注其子贈

公贈公又歿於是又誨育諸孫給事狀曰諸孤不天大母寔代吾父父我而又無母我嗟夫此媪之實錄也以故卒見給事與會稽俱成進士後而稱賓興者又登康子錄媪真大造翁氏者媪居常有主持大抵用儉為模而至所緩急輒濟活之無恡有姑嫁而夫婦俱夭為養其孤女長而厚遣之女至今感涕語輒歔邑不止羣從中疾有剝喪有祿視其力勉焉至烟或恃之然後突如是七十餘年萬曆己亥十一月初九日

奄歿享年九十有二一女嫁庠生王曰然亦不祿封孺人贈中憲大夫石村公之女媪嘗慮贈公卑子織學兩世而名聲不揚封孺人來胤遂蕃其大者若鸞鷲騫騰九霄其次猶斑豹澤霧中媪誠楛柱封孺人榱之臬之而後奧窔立成茲大宮豈易乎哉及病革注視封孺人沈瀾久之誠眷眷不能一旦捨去者所謂是婦是姑有始卒者歟承重孫娶大冶陳令公孫女郡弟子貞娶譚又娶江山時令公孫女給事娶庠生張

女封孺人舉人娶楊女會稽令娶無錫朱女出
後乃叔女一適錢時濟曾孫男五承重孫出者
暨郡弟子各二給事一曾孫女十一人玄孫男
一其姻屬皆士族具狀中卜以某年月日葬於
關龍橋祖塋之次與介石公合銘曰
方渙渙誰揭之旦方濯濯誰錫之瓚維帝顯庚
降英媛也翼其渠樞抵艱扞也我不歎愛吾劬
肅以盟也一葵百殿大無畔也追日琢景蒙所
翰也賁茲土方頽星漢也

墓碣一首

鄞邑庠訓導吳君墓碣

嗚呼是惟錫山故司訓吳君之墓君諱應兆字
昌伯方在姪時大父音參軍未寧夢食桃馳書
謂其子汝愈君父也得男必名桃已遜於嫌去
木以兆行髫年即解屬文諸父太史澤峰公異
之曰兒大不凡既壯以毛詩籍諸生尋食廩是
時督學耿公講道江以左士率風靡獵聲華即
名高弟子而君獨介然絕去誇誕務本於根公

大喜之子能躬吾言矣君兄弟凡四人俱邑弟子負稱儒數而君久困諸生凡八躓於鄉已哭其母陸已又喪父哀苦幾至毀滅丙戌歲薦上春官試戊子授鄞訓導自守廉用靖鎮其跡口有典紀而身宅於端孤悲如也徃徃忘其匱而急諸生寔鄞人士無不嚴重吳先生者君雅自負既失遭選晚得一官不為賴娶於王河南武涉令堯卿女謹矜有禮忽病死君時謁選不及訣弔影自傷強而之官悒鬱不自聊遂及於病歿之日為萬曆辛卯十月十七日得年六十四孺人蚤謝不及君八年一子會有志能文將以某年某月某日奉王孺人合葬某阡而乞碣言余嘗督學秦中從諸校官巡行郡國咄夫死而可碣者誰夫如吳君之為鄞師無可訾善是以著之碣焉若其他誼事會自有狀茲不著

農文人文集卷之十四

書記周禮寫

